

**Uani qinigaaffimmi Ilulissani GUX-imik pilersitsinissamut suliaqarnissamik Naalakkersuisut peqquneqarnissaannik Inatsisartunut aaliangiiffigisassatut siunnersuut.**

(Inatsisartunut ilaasortaq, Nivi Olsen, Demokraatit)

**Akissuteqaat**

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

**Siullermeerneqarnera**

Naalakkersuisut uani qinigaaffimmi Ilulissani GUX-eqalernissaanut sulissuteqarnissaannut tunngasumut siunnersuuteqartoq Nivi Olsen Demokratineersoq qutsavigaat.

Nammineq illoqarfiginngisami/nunaqarfiginngisami ilinnialernissamut piareersaataasumik ilinniarniarneq unammillernartoqarsinnaasoq Naalakkersuisut paasisinnaavaat. Tamanna nutaanik ataatsimoornermik pilersitsisarpoq inuusuttunullu aamma annertuumik piunasaqaateqartoqartarluni. Aamma isumaqataavugut maani ilinniartut amerlanerulernissaannut pitsaanerpaamik sinaakkusiinissamut tamatta takorluugaqaratta.

Tamakku tassaasinnaapput ilinniarfinnik nutaanik pilersitsinerit, illoqarfinnik allami ilinniarnertuunngorniarfimmik ammaanerit kiisalu tamanut pisariaqartitsisunut ilinniartut inaannik naammattunik qulakkeerinninnerit.

Naalakkersuisulli naliliinerat aamma tassaavoq ilinniarfiit pigisatta sapinngisamik pitsaanerpaanissaat atorluarnissaallu qulakkiissallugit aamma pingaartuummat.

Ilinniartitsissutissatut eqqortunik avatangiiseqarnissaata qulakkeernissaa pingaartuuvoq, taamaaliornikkut ilinniartut ilinniarnissaminnut pitsaanerpaamik sinaakkuserneqarniassammata.

Naalakkersuisut naliliinerat tassaavoq ilinniarnertuunngorniarfik minnerpaamik sisamanik, ajornanngippat tallimanik, sammiveqartinneqarluni ingerlanneqassasoq, ingerlalluarnissaa qulakkeerniaraanni. Tassa ukiut pingasut ingerlaneranni klassit 12-it 15-illu akornaniillutik.

Assersuutigalugu tallimanik sammivilimmik aallartitsisoqarpat ilinniarnertuunngorniarfimmilu klassip ataatsip aallartinnerani 24-nik ilinniartoqarpat ukiuni pingasuni siullerni ilinniartut ukiumut 120-ussapput. Taamaalillutik ilinniartut ukiut pingasut ingerlaneranni amerlanerpaamik 360-iussapput. Naak uniinnartartut aalajangersimasumik amerlassuseqarnissaat ilanngunneqarsinnaagaluartoq ilinniarnerminnik unitsitsiinnartartut taakku ilinniartitsisunik pisariaqartitsinermik minnerulersitsinaviangillat, tassa klassit eqimattallu taamaattoqarnerani ingerlaannartumik atorunnaarsinneqarsinnaannginnamik klassini eqimattaniluunniit ataasiakkaani atuartut amerlassusaat ikiligaluartut.

Ilinniarnertuunngorniarfimmik tallimanik sammivilimmi atuartitsisussanik allaffissornikkullu sulisussanik il.il. sulisut 50-it missaat pisariaqartinneqassapput. Ilulissani ilinniarnertuunngorniarfimmik tallimanik sammivilimmut naammattunik ilinniartussaqaanginnerup kingunerissavaa ilinniartunut illoqarfinit nunaqarfinnillu allaneersut inissiaqartinnaat pisariaqarnerulissamat. Taakku saniatigut inassutaavoq GUX-it tamarmik assigiinngitsunik ilinnialernissamat neqerooruteqarsinnaassasut, taamaangippammi ilinnialersussat najukkameersut illoqarfimmut allamat ilinniarnissaminnut qinnuteqartussanngornissaat ilinniartitaanermik pisariaqartitaat naammassiniarlugit.

Naalackersuisut naliliinerat tassaavoq ilinniarnertuunngorniarfimmik nutaamik qanorluunniit angitigisumik sumiluunniit pilersitsisoqassagaluarpat qinnuteqartartut eqqarsaatigalugit ilinniarfissat amerlavallaalernissaat, qinnuteqartartut piffissap ingerlanerani amerliartoraluarpataluunniit. Ilinniarnertuunngorniarfimmik pilersitsisoqarpat ilinniarnertuunngorniarfimmik allami matusisoqartariaqalissaaq, matumani Aasianni GUX, tassa kommuni kommuneqatiminnit ilinniartunik aamma tiguisaramik.

Siunnersuuteqartup §37 naapertorlugu nr. 39/2021-mut akissuteqaat innersuuppaa, tassani Naalackersuisut ilisimatitsissutigat tallimanik sammivilimmik ilinniarfiliortoqarpat ikinnerpaamillu 15-inik klassitaqassappat ukiunullu pingasunut avinneqassappat sanaartornera 229.008.000 kr.-it missaannik akeqassaaq, ingerlannera ukiumut 27.750.000 kr.-nik akeqassaaq ilinniartunullu inissialiornermut 570.000.000 kr.it missaat atorneqassallutik.

Naalackersuisut taamaamat naliliinerat tassaavoq Ilulissani ilinniarnertuunngorniarfimmik pilersitsinissamik salliutitsiniarnermi iluaqutissat ajoqutissanit ikinnerusut, tassa sullinniarneqartut allamat nuussinermi annikitsuaraanermik iluaqutigissammasuk.

Naalackersuisut aamma maluginiaqqussavaat eGUX-imik pilersitsinikkut illoqarfimmit/nunaqarfimmit najukkamit ilinniarnertuunngorniartoqalersinnaalermat, illoqarfiit sisamat ilinniarnertooqarfiit pioreersut saniatigut. Taamaalillutillu aamma inuusuttut illoqarfigisaminniiginnarusuttut/nunaqarfigisaminniiginnarusuttut ilinniarnertuunngorniarnissaminnut periarfissaqalissapput, avatangiiseq sungiusimasartik qimattariaqarnagu.

Tamatuma saniatigut Naalackersuisut maluginiaqqussavaat naak Ilulissani GUX-imik pilersitsisoqaangikkaluortoq, Ilulissani ilinniartitaanerp ineriartornissaa pingaartinneqarluinnarmat. Perorsaanermik Ilinniarfik nutaanik inuiaqatigiinnullu tulluurtunik ilinniarnernik suli ineriartortitsiuassaaq, kiisalu Ilulissani silap pissusaata allanngoriartornera pillugu ilinniarfimmik pilersitsinissaq sulissutigineqartoq Naalackersuisut aamma maluginiaqqaat. Silap pissusaata allanngoriartornera pillugu ilinniarfik kandidatitut ilinniarfiussaaq, kalaallinut bachelorinut pitsaanerusumik ikaarsaarnermik pilersitsisinnaasoq. Taamatullu illoqarfimmi ilinniartitaaneq nukittunerulissaaq pilerinartunillu pinngortitamik inuiaqatigiinnullu tunngasumik ilisimatusarnermut pikkoriffilinnik kandidatunik ilinniartoqalerluni. Taamaaliornikkullu Kangiata Illorsuata pilersinneqarnerani sunniivigeqatigiinnissamat periarfissaqarsinnaalluni.

Naalackersuisut taamatut oqaaseqarlutik siunnersuut itigartinneqassasoq inassutigat.